


醫籍攷

卷六十一六十二
方論三十九四十

武
2
31



武
2
卷 31

九折堂山田
氏圖書之

岡氏
齋

岡氏
圖書

醫籍考卷六十一

東都 丹波元胤紹翁 編

方論 三十九

歐陽氏植救急療貧易簡奇方

一卷

存

景陵縣志曰歐陽植字叔堅邑庠生治舉業旁精醫著有靈
臺秘要邑進士胡懋忠刻於固始有易簡奇方邑進士熊寅
刻於婺源有全生四要邑知府王曰然刻於臨洮
靈臺秘要

未見

陸氏道元 範蒙醫會錄

未見

陸道元曰小兒雜證便蒙捷法外有藥性脈法經脈運氣傷寒雜證女科總名之範蒙醫會錄尚在修纂待完日併刊以就高明同志者正之是望 金錄補遺

呂氏祥急篤怪疑試効奇方

醫箴目錄六卷

未見

亡名氏孤峯捷驗方

醫箴目錄卷闕

未見

沈氏野暴證知要

二卷

存

潘氏雲杰 類集試驗良方

二卷

存

梁氏學孟 痰火顛門 陸世科刻本改各國醫宗旨

醫箴目錄四卷

存

梁學子孟曰醫之可法者自軒岐而下張仲景李東垣劉河間朱丹溪之外代不乏人徧搆全書而讀之知內經即吾儒之論孟也張李劉朱即吾儒之周程張朱也而諸賢又所以羽翼于內經者也玩味之餘因見十二經之病火居大半故人

之橫亡暴夭者悉是火證而為庸醫所誤十常八九遂作痰火顛門

龔氏居中痰火點雪

四卷

存

經驗良方壽世仙丹

十二卷

存

經驗百効內科全書

八卷

存

徐氏師曾醫家大法

二卷

未見

途中備用方

一卷

未見

亡名氏應急良方

一卷

未見

謝氏奇舉元微秘要

八卷

未見

徐氏常吉醫家正典

一卷

未見

亡名氏醫學發蒙

二十三卷

未見

醫翼通考

二卷

未見

邵氏之翰調理四證切要

一卷

未見

段氏成冕經驗良方

一卷

未見

松篁劉氏闕名經驗方

三卷

未見

談野翁試驗小方

四卷

未見

亡名氏太乙紫金丹方

一卷

未見

按右十三種見于淡生堂書目

陰氏有瀾醫貫奇方

一卷

存

太平縣志曰陰有瀾字九峰太醫院吏目通覽群籍尤精性理其治疾也根極五行生剋而神明出之遠近求藥者日千計瀾悉洞徹膏肓計日報可暇即延請師儒講究理學年八十八歲往來臺使者皆望風式廬以為人瑞沒祀陽明書院

亡名氏窮鄉便方

二卷

存

王氏良琛小青囊

十卷

存

吳氏中秀醫林統宗

未見

右見干松江府志

方氏隅醫林繩墨

八卷

存

自序曰繩墨一書乃為後學習醫之明鑑俱領內經景升東垣丹溪河間諸先生之成法而著方立言非方穀一人之私論也蓋醫之一道其理甚微其責甚重活人生人在此三指之下兩劑之中若無主見未有不殺人者穀自肄業以來早夜精心微危是慎日與諸門弟子諄切講解故以生平所讀之書意味深長之理時刻玩誦或前先生所立之論未及配方或前長者所主之方未及著論方論不齊難以應用由是一一配合必使補瀉升降得宜寒熱溫涼有準分門別類酌

病投湯如涉海者授之以指南之針如登山者告之以曲折之路又復定立主意俾不猶疑庶使後之有志救世者引繩畫墨不致以生人之道而為死人之具也如其中見有差訛識有未到凡我同志乞為筆削論訂之則醫林幸甚而醫之為道亦幸甚萬曆甲申八月既望日七十有七老人錢塘醫官方穀書

周京氏序畧曰先生何時人生於前之隆慶失厥稱字其著是書也乃在萬曆之甲申有引自號為七十有七老人仁和醫官方穀想亦家世相傳而善精岐黃之學者歟時康熙十六年歲在丁巳立春後九日向山堂夕惕主人周京雨郇氏

序

鄭氏澤墨寶齋集驗方

卷

存

自序曰不佞澤居常願人人無疾痛病苦故最喜禁方書每聞人蓄方書試之驗者無敢不叩叩之無敢不盡盡矣輒解試之試之再驗乃始付之管城君為漸紀錄錄之既久至三十餘年迺可成帙已不敢自秘輒思公於人故謀付歌劂氏以廣其傳遂徵序于白下焦太史太史相視而笑莫逆於心

曰子有禁方願藉我以信之吾亦有禁方欲藉爾以傳之因
合而并刻之共得如千條皆已驗之方精良之伎也天下大
矣豈無有同志而更喜方書者乎凡有新得有未備請即隨
手增補之或可轉刻可繕寫請即隨力傳布之俾人得免于
疾痛病苦渠寧無負不佞澤之初心凡苟有患者循彙而求
之庶亦可恃以無恐者矣夢圃居士鄭澤題

黃氏惟亮 醫林統要捷法通玄方論

四卷

存

喻氏政 虺後方

一卷

存

胡氏一龍 青囊至秘

十二卷

未見

羅氏周彥 醫宗粹言

十四卷

存

賀萬詐序曰慕齋羅君蓋余老年伯聞野大中丞諸孫也家
學淵源施於有政復精素問難經及諸名賢宗指刀圭所至

凋瘵盡平時捐俸脩散濟宇下比三載而海上頌更生與其稱不究者聲相襲矣會邑士大夫謀廣其術以壽斯民遂出手編若干卷題之曰醫宗粹言蓋集古聖賢之成而不自居且明對方先論原本君之言曰人之初生受一氣而後情欲漸開也故立先天後天元陰元陽之辨而統之曰元氣論有氣則有消息盈虛遲速順逆之生機而脈兆焉自八十一難叔和王公暢其指鶴臯吳君其蘊今稍增益其未備而仍存其題以著篇首氣有先後天不能不藉於養故曰上藥養性中藥養命是以藥性次之法攻焉用藥如用兵詎可執一其歸隨證之法不可易也次之用藥準繩運氣不齊受

病亦異不替之天行其奚以盡矣次之以四時方論若夫男女長幼以及內外科方術雖殊總之歸本元氣斟酌脈理因時隨證攻與而已故以四科備錄終焉旨哉君之論乎詳而有要簡而不遺祖述軒岐備名賢而啓祐後學者其在斯乎仁術且永垂矣蓋君幼而善病弱不勝衣遂業儒書博綜羲農而後尊生調攝名理有味乎文正之言達則良相窮則良醫其造命同也自是南遊吳楚北涉淮泗僑寓良安者十餘襍與諸名賢家及薦紳學士討論研究佐以慧投之即響應景從至分符海上醫療與政事並傳或者方之淳于公云余先大王父春軒公以病惕然許世子之戒也盡去

其所學而學子為竟為名醫所著有醫經大旨明醫會要諸書
行於世蓋亦先原本後成方也今得君集竊有當於衷綴言
簡端若夫吏治侯錄之采風者姑略之君諱周彥字德甫號
赤誠歙縣人

江南通志曰羅慕菴徽籍移家泰州醫不取利其持論先調
理而後湯藥災疫流行施藥救人全活無算所著有醫宗粹
言四十卷行世

王氏師文醫學新傳

未見

蘭谿縣志曰王子英子師文號敬舟著醫學新傳

邢氏增捷醫案心法

未見

按右見于新昌縣志

吳氏文獻三石醫教

四十卷

未見

按右見于婺源縣志

朱氏日輝醫學元要

未見

婺源縣志曰朱日輝字充美東源人天性溫粹篤志嗜學於

書無不讀長於強記後棄舉子業專治岐黃家言按脈審方
一以儒理為權衡所值多全活邑令周天建重其名時加幣
聘輝屢晉謁無私請周益禮之尤勇於義保先塋繼絕祀殯
遺骸置祭田毅然舉行堪為末流針砭不獨以刀圭擅譽也
與中翰余垣稱莫逆垣嘗為文美之龍眠方中發亦賦詩貽
贈一時知名群和為所集有醫學元要加減十三方試奇方
聞見錄大家文翰等書授子瑩瑩得其學亦以醫名世
加減十三方

未見

試奇方

未見

張氏用謙醫方摘元

未見

無錫縣志曰張用謙深究朱李著有醫方摘元同時有徐吾
元論運氣甚精博有醫經原旨

徐氏吾元醫經原旨

未見

程氏公禮醫家正統

未見

幼幼全書曰程公禮字耆祥休寧豐大基人幼有至性事父

雲端母吳孝謹晨昏不離長娶吳氏相敬如賓恒念貧無以濟人乃夙夜研究方書遂博通素難百家言所經診治諸驗詳醫學傳著有醫家正統行仁輯要保赤方略藏於家

行仁輯要

未見

繆氏希雍先醒齋筆記

醫藏目錄一卷

存

丁元薦序曰先大夫雅好醫錄方幾成帙予小子試之茫乎無緒也歲丁亥交繆仲淳氏仲淳豪爽自負岐黃之訣諦東

垣仲景以上尤注精本草曰三墳書不傳傳者此爾遊轍不持藥囊爲人手疏方輒奇中其所矚視及刀匕湯液與俗醫尤俗醫不能解輒謗遇險怪證數年不起或皇遽計無復之必拱手請質繆先生仲淳徃徃生死人壞臂自快不索謝上自明公卿下至卑田院乞兒直平等視故索方日益相知錄其方迺相傳試靡不奇驗仲淳一切無所怯曰顧用之何如爾仲淳意所獨到堅執不移至俗醫相顧却走意氣閑定自若其察脈審證四顧踟躕又甚細甚虛甚小心生平好遊緇流細客樵叟村豎相與垂眄睐披肝膽以故蒐羅秘方甚富然惟仲淳能哀之曰吾以脈與證試方不以方嘗病也予幸

亥賜告歸不敢以山中餘日漫什高枕彙三十餘年所積方
取奇中者裁之仲淳并錄後先醫案類而梓之以廣其傳竊
自附古人手錄方書之意云仲淳諱希雍海虞故家子多僑
寓所至稱寓公癸丑春日曲肱道人丁元薦題

先醒齋廣筆記

四卷

存

自序曰予既不事王侯獨全微尚幽棲自遂遠於塵累以保
天年然無功及物亦豈道人之懷乎於是蒐輯醫方精求藥
道用存利濟隨所試効病家藏之好事者抄錄轉相授受復

多獲驗先是長興丁客部長孺手集方一冊命之曰先醒
齋筆記梓行於世板留巖邑未便流通交游中多索此書者
卒無以應予適旅泊金沙文學莊君欽之時時過從請增益
群方兼采本草常用之藥增至四百餘品詳其修事又增入
傷寒溫病時疫治法要旨併屬其李君欽之鏤板流行傳之
遠邇庶窮鄉僻邑舟次旅邸偶乏明醫俾病者按方施治以
瘳疾苦則是書或行補於世也夫欽之曰善時天啓二年歲
次壬戌仲冬既望東吳繆希雍自序

四庫全書提要曰先醒齋筆記四卷明繆希雍撰希雍字仲
淳常熟人明史方技傳附見李時珍傳中天啓中王紹徽作

點將錄以東林諸人分配水滸傳一百八人姓名稱希雍爲神醫安道全以精於醫理故也是編初名先醒齋筆記乃長興丁元薦取希雍所用之方裒爲一編希雍又增益群方兼採本草常用之藥增至四百餘品又增入傷寒溫病時疫治法故曰廣筆記希雍與張介賓同時介賓守法度而希雍能頗變化介賓尚溫補而希雍頗用寒涼亦若易水河間各爲門徑然各有所得力朱國禎湧幢小品記天啓辛酉國禎患膈病上下如分兩截中痛甚不能支希雍至用蘇子五錢即止是亦足見其技之工矣

本草單方

十九卷

存

錢謙益序曰繆仲淳既沒數年其著書多盛行於世而所摘錄本草單方朱黃甲乙狼籍篋笥中康文初莊欽之蒐討證次窮歲月之力而後成書于執侯梓而傳之於是繆氏之遺書粲然矣仲淳以醫名世幾四十年醫經經方兩家浩如煙海靡不討論貫穿而尤精於本草之學以謂古三墳之書未經秦火者獨此耳神農本經朱字譬之六經也各醫增補別錄朱墨錯互譬之注疏也本經以經之別錄以緯之沈研鑽極剝理解神而明之以觀會通本草經疏之作扶摘軒岐

未發之秘東垣以來未之前聞也出其餘力集錄單方劉其
踏駁舉其蕪穢其津涉生民者甚至此書成而經疏之能事
始畢仲淳可以無憾于地下矣三君之功豈曰小補之哉仲
淳電目戟髯如世所圖羽人歛容者譚古今國事盛敗兵家
勝負風發泉湧大聲殷然欲壞墻屋酒間每慷慨謂余曰傳
稱上醫醫國三代而下葛亮之醫蜀王猛之醫秦繇此其選
也以宋事言之熙寧之法泥成方以致病者也元祐之政執
古方以治病者也紹述之小人不診視病狀何如而強投以
烏頭狼毒之劑則見其立斃而已矣子有醫國之責者今將
謂何余沈吟不能對仲淳酒後耳熱仰天叫呼痛飲露醉乃

罷嗚呼仲淳既老病以死而余亦連蹇放棄效忠州之錄方
書以終殘年因是書之刻念亡友之墜言爲廢書歎息者久
之仲淳諱希雍吾里之右族也僑居長興後徙於金壇老焉
葬在陽羨山中余它日當爲文以志之崇禎六年十二月虞
山老民錢謙益叙

易氏思蘭醫案

一卷

存

趙氏廉可醫貫

六卷

存

徐氏靈胎醫貫

二卷

存

四庫全書提要曰醫貫二卷國朝徐大椿撰初明趙獻可作醫貫發明薛己醫案之說以命門真火真水為主以八味丸六味丸二方通治各病大椿以其偏駁作此書闢之考八味丸即金匱要略之腎氣丸本後漢張機之方後北宋錢乙以小兒純陽乃去其肉桂附子以爲幼科補劑名六味丸至明太醫院使薛己始專用二方爲補陽補陰要藥每加減以

治諸病其於調補虛損未嘗無効獻可傳其緒論而過於主持遂盡廢古人之經方殆如執誠意正心以折衝禦侮理雖相貫事有不行大椿攻擊其書不爲無理惟詞氣過激肆言辱詈一字一句索垢求瘢亦未免有傷雅道且獻可說不能多驗今其書已不甚行亦不必如是之詬爭也

程氏雲鵬醫貫別裁

未見

程雲鵬曰趙氏撮李薛之要最爲直截而措引不純主張太過懶漫者狹爲秘本將欲廢棄一切遺害匪小余爲汰去支辭補入諸家雜證方論頗覺改觀慈幼筏序

趙氏獻可二本一例

未見

按右見于鄞縣志

王氏化貞普門醫品

四十八卷

存

凡例曰是書之刻始於本草綱目故各門之方出于本草者十之七八不足則旁掇諸名家之方以益之其有病而本草無方者補以名醫所錄及諸驗方以成全書

四庫全書提要曰普門醫品四十八卷附醫品補遺四卷明

王化貞撰化貞字肖乾諸城人萬曆癸丑進士官至僉都御史巡撫遼東以債事伏誅事蹟附見熊廷弼傳是編摘採錄本草綱目諸方參以諸家論述詳列病證分類彙編每門冠以總論但有證候而不載診法其凡例謂是書為不知醫者設然望聞問切猶或審證未真用藥多舛况舍脈而論方則虛實寒熱之相似者其誤必多執影響之見而苟冀一效其貽誤封疆亦此學問矣

普門醫品補遺

四卷

存

行笈驗方

八卷

存

王夢吉傳因曰輯是書者余師誠城王肖乾先生諱化貞登癸丑甲榜爲三韓撫軍弱冠時病瘵幾危曾於途間遇黃冠授一秘冊焚香開脉乃醫方也由是病愈師切感之後歷宦十年每以施濟爲事曾捐千金刻普門醫品一書二百餘卷養生家貧不能購余在長安每言大煩師曰我今返博歸約矣乃盡出是書以示謂余及門周旋久因抄以授余余雖拜抄而實未諳旋出都走秦晉郢楚間逆旅遘疾每試立愈人

亦向余索治無不藉藉稱善比年幾半百艱于得嗣因向藥王立願以足三萬爲緣十餘年來盡力殫施纔及萬數連舉子三昕夕焚頂彼蒼亦謂不負余之志矣邇來家計日蹙藥品較昂力難再繼有友謂余曰願力易盡也盍出枕秘以廣其傳使天下知而驗之不弟滿子三萬願功且等恒河沙矣余遂簡書得四百餘葉因以授之梓

李氏中梓願生微論

明志十卷

未見

刪補願生微論

四卷

存

自序曰夫用兵救亂用藥救生道在應危微之介非神聖不能善中也故兩者均自黃帝發之非黃帝之獨能注精也得道之至者靡弗通靡弗通而兼通於醫者乃入神聖三略云莫不貪強鮮能守微人能守微乃保其生聖人存之以應事機何長生之學偕於殺機之發乎蓋靡弗通而通焉者耳余少治經生言及兩親子俱以藥誤予又蚤歲多病始惕然迫于思而以鄒魯之業兼攻黃家言藥世道之受病而因以通有生之疾似同源而流矣自神廟戊午採輯成是編鐫而懸

之肆乃翕然徧走天下嗣後非不究天人參禪玄詢國政未甘擅專門學而携挾持扶以請一刃圭者日且相迫三吳中遂以長沙氏目相之予豈敢云靡弗通而通于是抑亦相迫而漸至使然者耶今二十五年以來不無少進階級思一再訂期絲毫不有誤後世而未可輕與語也庚辰秋吳門沈子朗仲翩然來歸一握手而莫逆於心端凝厚葳慷慨浩直而不漫齒頰峩然載道之偉器與語移且暮鮮弗神領靈樞諸經典了然會大意投藥中窺若然如庖丁游刃豈特曰吾道西矣而邈然弗可量已于是相與辨幾微參益損躋顛極破偏拘皇皇登于大道以俟百世可以畫一則庶幾其快我隱

謝我過烏嗟乎吾道之不孤其有賴于朗仲也乎因再付之
剞劂與同事諸君更一改觀儻云知青于藍雖釋其舊本可
也已崇禎壬午四月華亭李中梓書

四庫全書提要曰刑補願生微論四卷明李中梓撰中梓字
士材華亭人是編初藁定於萬曆戊午已刊版行世崇禎壬
午又因舊自訂之勒爲此編凡二十四篇曰三奇曰醫宗曰
先天曰後天曰辨妄曰審象曰宣藥曰運氣曰藏府曰別證
曰四要曰化源曰知機曰明治曰風土曰虛癆曰邪祟曰傷
寒曰廣嗣曰婦科曰藥性曰醫方曰醫藥曰感應門類頗爲
冗雜三奇論中兼及道書修煉如去三尸行呵吸等法皆非

醫家本術也

醫宗必讀

十卷

存

自序曰余惟文人之舌思若泉湧詞若藻發可以鞭雷驅電
繡虎雕龍縱其才之所之而無所不極若夫醫宗則不然呼
吸存亡之變埒於行師轉盼補救之功同於澍雨雖有懸河
之口驚筵之句固不如本情性考墳索率典常以揆方神化
以通微之爲得也且書以詔來茲言之當則爲濟世之航不
當即爲殃民之及自非研機循理宏採約收曷能扶神聖之

玄開斯人之曠乎嘗考古之著醫書者漢有七家唐九倍之
得六十四宋益以一百九十有七兼之近代無慮充棟然金
匱玉函之精而六氣之外不詳天元玉冊之密而拘方之詞
多泥孝忠亂錢乙之撰完素假異人之傳上谷之書久湮睢
水之法偏峻況其他乎俚者不堪入目庸者無能醒心約者
多所掛漏繁者不勝流覽蓋余究心三十餘年始知合變而
及門者苦於卓也曩所著微論諸書未盡玄旨用是不揣鄙
陋纂述是編顏曰必讀爲二三子指南會友人吳約生偕其
弟君如見而俞之曰哀益得中化裁盡變明通者讀之而無
遺珠之恨初機者讀之而無望洋之嘆其可秘之帳中乎遂

捐貲以付之剞劂而嘉惠學者以亟讀余曰讀書之難難在
輪扁之說齊桓也不疾不徐有數存乎其間余之爲此書也
僅爲渡河之筏耳若夫循其糟粕悟其神理默而成之存乎
心解余不能喻諸人人亦不能得之于余讀是書者無輪扁
所笑則幾矣友人聞而俞之而命余弁其首崇禎丁丑春仲
李中梓識

蕭京曰李士材諱中梓其先人官吏科君亦明經薄仕而隱
于醫博洽洞曉具有絕識閱其所刻醫宗必讀僅五冊詞簡
而明法精以詳尤爲當世正法眼余婆心熱腸每欲遠訪參
印疑義苦爲兵戈梗道有志未遂俟之他日耳

軒岐救
正論

病機沙篆

二卷

存

沈氏士逸 翠世元機

未見

浙江通志曰沈士逸字逸真仁和人善醫知名少時嘗獻書
經略邢公竒之置為裨將令督兵海上以功為遊洋將軍已
父祖相繼沒母孀弟幼遂絕意疆場奉母滄漚而產日落乃
發篋讀禁方盡得要祕數年名大起日造請者數十百家全
活不可勝數既老構園池多樹竹木種菱芡日抱琴書坐卧

其中賢士大夫軒車致門多不時出而以疾來者則率爾命
駕無問近遠年六十有六病瘡卒所著海外紀聞翠世元機
清乘簡園集若干卷

王氏大德是病總覽緊要真方

或題百發百中萬
病回春緊要真方

七卷

存

張氏文介醫要見證秘傳

三卷

未見

亡名氏虛實辨疑示兒仙方

十卷

未見

臧氏仲信醫例

未見

長興縣志曰臧仲信長興人作醫例丁元薦序

戴氏邦聘醫學善傳

未見

按右見于建德縣志

唐氏守元醫鑑

未見

平湖縣志曰唐守元號吾春璜溪人贅於陸因傳其業一婦人偶食羊膾呼未及吞而應逾月病發淹及兩年守元曰此必曾有宿物家人曰兩年不食矣曰試以我藥投之既而吐痰塊中裹羊肉一臠遂愈又祝氏兒患痘遍身血迸無鐸守元搗藥塗其身搽藥鋪裯褥上捲起倒豎牀前合家駭啼叱曰若輩勿啼此名蛇殼痘氣必用逆乃得脫而已皮膚解裂如蛇脫然遂愈新帶顧氏男痘後目瞽守元曰惜我見之晚當先開一目三年俱復明果驗醫鑑醫林繩墨後金鏡錄皆其手輯

醫林繩墨

未見

張氏柏醫案

未見

蘭谿縣志曰張柏字世茂原歙人祖遷於蘭少習博士業已而以父病居久遂棄而讀內經本草群書從事於醫延治多驗大概主參朮補法而隨時定方父病得延暮年而醫道著行矣爲人長者不厚責報人以病請即夜十數起弗辭事親有禮撫弟姪友愛分給田宅有古人風診脈斷疾生死深淺輒有奇驗平生所著有醫案

馮氏可衆妙仙方

未見

自序畧曰往不佞居里鄒爾瞻氏自白下以簡便方遣之曰願以是廣仁術也不佞拜受而竒藏之已居粵涪陵方伯文公又惠救急易方用藥所苦罔不瘳是年兩粵間冷大發愾溷腐濁之氣中人膚也往往致濕造熱令人內若結轡而外若被醒先後斃者幾以澤量樽積積如基矣中丞廣陵公直指南昌涂公憂之命有司給糶給餼罔不左顧粵俗爭尚鬼病則傾橐事禳穰不急醫即醫亦多耳學臆斷不程方無論內經靈樞玉函金櫃與桐君所錄雷公所記莫之探即近代劉朱數家所銓綜者亦溥不識爲何物民不幸爲二豎所虐

六賊所侵，不以其身委於茫寐不可測之神，則以其身試於庸下不可托之醫，其能成三折而起一匕者，何幾哉！不佞往以童子侍先廷尉，得案上一帙，嘗操以自衛，茲復參以二書，嘗叢成集，念粵無良醫，不敢秘也。謀付諸剞劂，氏廣其傳，命曰衆妙仙方，襲先名也。馮元成選集

蔣氏宗懔慈濟易簡方

未見

按右見于浙江通志

秦氏昌邁大方折衷

未見

松江府志曰：秦昌邁，字景明，上海人。天資警敏，少善病，因遂學醫，治嬰兒疾，稱神已。而徧通方脈，不由師授，妙悟入微。常行村落，見婦人浙米使從者挑怒之，婦人忿詬昌邁，語其家人曰：若婦痘且發，當不治。吾激其盛氣，使毒發肝部，耳口下春時應見於某處，吾且止，是為汝活之。及暮如其言，乞藥而愈。青浦林氏子年方壯，昌邁視之曰：明年必病，瘵三歲死。明年疾作，踰兩春竟死。昌邁所剞劂時日皆不爽，其或病至沈篤，時師張口貽目，昌邁投劑能立起，名動四方。往來無寧晷，然未嘗自多，嘗謂法當死者，雖盧扁不能為，苟有生理，勿自我死之可矣。為人瀟灑自適，預知死期，年六十餘卒。所著大方

幼科痘疹折衷行於世

醫籍考卷六十一

醫籍考卷六十二

東都 丹波元胤紹翁 編

方論 四十

黃氏承昊 折肱漫錄

七卷 明志作六卷

存

自小引曰古人云不為良相則為良醫意在濟世也予少年病羸微纏一二十年備嘗諸苦少不知醫多誤藥苦迺彌甚當茹荼時苦極而悔悔極而恨恹恍惛幾瀕於死私自失矢日吾病得愈吾年得老必揭此以告同患者使毋蹈予之覆

輒有所苦隨筆記之久而成帙迨後病得漸瘥更得致身雲
路碌碌世緣未暇問此且念吾年未老閱歷未深恐識見尚
有誤以誤人姑寄而藏之今歸田無事年已六十矣閱歷深
識見定矣庶可災黎以告同患乎乃搜故箴所存而益以近
記題曰折肱漫錄蓋取三折肱成良醫之義一曰養神一曰
養形一曰醫藥非身所親歷口所親嘗目所親覩都不敢混
載以欺人蓋予生平凡方書所載之症十患四五本草所載
之藥亦十嘗四五夫豈勦陳言拾道聽以侈觀覽者予官雖
不甚顯而宦輒所至必孜孜以利濟爲事今梓是編亦一片
婆心所使上不能爲良相而頗存良相之心下不能爲良醫

而畧明良醫之道云爾崇正乙亥菊月肱樂白道人黃承昊
題於樂白軒

程永培跋曰黃履素前明萬歷丙辰進士幼而賦質虛弱年
至七十餘歲自云藥品十嘗四五則一生無日不在病中矣
有妄投峻劑爲醫誤者有調理不善而自誤者歷驗親切遂
著折肱漫錄一書一則曰養神篇一則曰養形篇一則曰醫
藥篇其意是惕病者之鑑戒原非爲醫家立說也曾收入杏
林法海書目中蓋欲醫與病者皆不可粗忽也沈存中有五
難之說此非二難乎如陰虧質弱之人或一流覽則病情不
致於固結醫藥不致於輕試則此書之功亦不淺矣但養神

篇雖所採皆子史傍及釋道其說頗雜莫如案頭置鶴林玉
露等書更勝矣故不刊木乾隆五十九年三月古吳瘦樵程
永培跋于紫藤花下讀書軒

四庫全書提要曰折肱漫錄六卷明黃承吳撰承吳字履素
號闇齋秀水人黃洪憲之子也萬歷丙辰進士官至福建安
察使承吳體羸善病因參究醫理疏其所得以著是書分養
神養氣醫藥三門其論專主於補益未免一偏

此書之體裁與前書不同其論專主於補益未免一偏

存

自序曰醫術肇自聖神其効可以安危而起死乃民生壽命之急需而造化功用所不及者賴之以贊助也古有達則爲良相不達則爲良醫之語蓋謂其與變理同功耳然古今高明之士多視爲小技而漫不究心一旦身有病與所親之人有病則悉付庸愚之手使庸愚之陋識反得以握賢智之生死豈不謬哉聞有涉獵斯術者又自恃聰明不肯究極精深僅知粗淺而即自信自用反致悞已悞人其害尤甚也此二

者古今之通弊余嘗鑒之而思爲身計又思爲身所親者計是以究心於斯術數十年來博取而精研之深思而透悟之自覺有入於神妙者因病製方不膠于古方得心應手不拘於成說其初聊以自爲久而有知信者以軀命來托不論親疎貴賤皆盡心爲之調治是以每每取効而其効又多奇也効何以奇允病有易治者皆求治于時醫不求余治也其有病危難治時醫束手者然後求救於予余不計其危而治之十嘗治其八九與尋常効効不同此其所以奇也或有一二不治者則病已在膏肓而入骨髓扁鵲望之而走耳然余且爲之委曲求生至於必無生意而後已豈忍爲扁鵲之走乎

余歸休頗有暇日因取從前醫而効効而奇詳述而錄之病情與治法俱備令人可對勘也俾覽者咸知某病已危用某藥得宜而獲安某病瀕死用某藥中竅而迴生庶令後之病證有相類者可以觸類而通合宜而用則於天下後世之疾苦沈痾未必無裨也此余刻醫述意也茲刻僅錄其往者而來者猶可以續刻用是引諸其首皆萬歷丙辰秋仲之吉前知福建汀洲府寧化縣事清江久吾聶尚恒識

醫學彙函

十三卷

存

鄒氏元標

仁文書院集驗方

七卷

存

引曰是書凡四種其一為劔江李司馬親驗方其一為麻城劉司馬彰賜堂集方其一為焦翰撰墨寶齋集方其一予所得賀大學所集海上奇方侍御孫公刻以傳者蓋諸公卿家奇人奇書多有故足述也是書大者如瓊林武庫無所不載單者如以短兵接戰取勝在人自擇不耳間常窺世之病道多涂而不病病之方寡方及寡又多庸醫虛實陰陽罔辨立置人死地者實可哀憐予力既不能濟人之生又不忍視人

之死故托朱君侯仁者以廣傳因憶古人杜門集方良有以也秦昌元年菊月吉旦吉水鄒元標

馮嘉會序曰聞之醫者意也然則自軒岐來所博取于洪纖而詳研于臆腑者盡意之云乎夫天下意與法原自相持意緣法以行而後馭之精法傳意以出而後垂之永凡事皆然不獨醫已若不措法內之意而第騁意外之法以之應事未有不績墮而以之用藥未有不人費者今庸醫輩病政坐此余每謂天地好生民生實難世無善意之醫醫無可守之法詩張就斃累累而是思欲掇拾諸方傳布宇內以爲調燮之大端所不可廢者而苦無善本會余當撫大梁大中丞南臯

鄒公以所彙仁文書院方見示余欣受而梓之以廣公志時毘陵段生以儒術工醫從余使院復取其肘後一冊附于後噫是刻也鄒公所輯凡四種余一種法大畧具是矣亦俟夫善意者之取筏焉而勿第曰醫行意也天啓二年桂月吉旦瀛海馮嘉會書

盧氏復芷園覆餘

一卷

存

題詞曰覆餘原名病嚙辛亥病中六月風雨之夕偶拈者皆平日見聞及一二自得語期就正有道而未逮也癸丑刻金

錕釋文暇將檢校授劑不意為門人覆瓿矣僅從瓿上得
數葉聊付刻以意予就正之志因名覆餘癸丑仲夏自記
錢塘縣志曰盧復字不遠習岐黃兼通大乘與子之頤善療
奇疾凡尸蹙迴風投劑無不立愈

芷園臆草勘方

一卷

存

題詞曰甲午學醫讀諸方括頭昏心塞未解不能及見醫方
攷如兒方嘗甘草喜不自勝久之轉增懊悶聞素社論仲景
方有省信手拈弄一二則興盡且止雖披瀝肺肝多慙折襪

呈似博識少佐解頤壬戌長至日自記

芷園臆草存案

一卷

存

題詞曰辛酉病間出寄紫芝禪室憶自疾作案它日反覆展
視似覺有啓于中因思十年作醫其昭著人耳目真實得意
處頗有限量因隨記數則其望古人一著不虛豈不愧殺普
請博識大方洞察一生敗闕癸亥夏孟自記

曹氏秉鉉杏園醫案

未見

武進縣志曰曹秉鉉字公輔喜讀書有濟世之志因父病遂學醫曰我姑壽此一方民以延親壽庚申辛酉兩年大疫秉鉉不避危險治之不取其值所到處賴全活著杏園醫案行世

沈氏應暘明醫選要濟世奇方

十卷

存

張氏鶴騰傷暑全書

二卷

存

自序曰夫醫九流一技也而回天札與安樂躋壽域而補造物之不逮厥功博已顧五行在手則天可延陰陽未分則延者促已審之在跬步而適之則燕越可畏哉寒暑均天地之厲氣傷寒傷暑二病均厲氣之能生殺人者素問因寒因暑之說昭昭爲萬世的顧傷寒書創自張長沙詳於朱南陽也反覆精析於陶節菴其全書若眉列然學者類能據籍按方而施治故往往取效若傷暑一證醫書止勒小款中世皆忽之一過是證率目爲傷寒以發散等劑投之間加衣被取汗甚矣以致傷生者累累不悟可不悲歟予諸生時萬歷戊子夏患茲證勢極氣索瞽然自憤庸醫以爲脾胃內傷或以爲

勞役中折幾不自持。微醫汪韞石適在旁，蹙然曰：心煩面垢，此暑證也。何多指聞之？皆駭其名。予於醫中微解，依之服益元散二劑而蘇。仍調以加味香薷飲數劑而愈。遂著傷寒傷暑辨一篇，刊於暑月，印布兼施，藥餌其捷，効若谷響。乃發願搜羅群書，著為全帙，以濟世懼。閱歷未久，不中窳期。五十以後，方就筆研，戊申自計部以目恙請告杜門，靜攝得畢。志於性命黃老諸家，昕夕矻矻，無逸晷暇。即焚香兀坐，間入園內視，百日不佞，目愈後至天啓壬戌，感仙師教，就筆研挾古諸名家，參攷編集而成帙，拮据十餘載，約二萬餘言，分為上下兩卷。議論皆常語，不敢鈎深，以便醫家覽解。方多遵古，無

它竒宜證，則靈菽粟豈珍惜而食，其時百骸理宜也。要在於燕越岐路處着力耳。平高貢除妬忌，澄心察理，審證投咀，醫之上計乎。寧獨醫人一心耳，虛與實相反，拘與圓相仇。古今成敗之大關也。秉國成者與謀國計者，身係社稷安危，操萬姓命脈，虛心圓智，蓋可忽乎哉。予因醫而廣其說。天啓三年歲次癸亥孟夏朔旦，賜進士出身奉政大夫戶部陝西司郎中穎郡張鶴騰撰。

吳偉業曰：穎州之難，副使張公鶴騰罵賊死。

綬冠細畧補遺

李氏盛春病機要旨

一卷

存

治雜證驗方研悅

一卷

存

張氏介賓景岳全書

六十四卷

存

林日蔚紀畧曰先外祖張景岳公名介賓字會卿先世居四川綿竹縣明初以軍功世授紹興衛指揮卜室郡城會誓之東生穎異讀書不屑章句韜鈴軒岐之學尤所淹貫壯歲遊

燕冀間從戎幕府出榆關履碣石經鳳城渡鴨綠居數年無所就親益老家益貧翻然而歸功名壯志消磨殆盡棄所學而肆力於軒岐探隱研神醫日進名日彰時人比之仲景東垣云苦志編緝內經窮年縷析彙成類經若干卷問世世奉為金匱玉函者久矣全書者博採前人之精義考驗得之玄微以自成一家之書首傳忠錄統論陰陽六氣先賢可否凡三卷次脈神草擇諸家珍要精髓以測病情凡二卷著傷寒為典雜證為謨婦人為規小兒為則痘疹為詮外科為鈐凡四十卷採藥味三百種人參附子熟地大黃為藥中四維更推參地為良相黃附為良將凡二卷創藥方分八陣曰補

曰和曰寒曰熱曰固曰因曰攻曰散名新方八陣凡四十卷
集古方分八陣名古方八陣凡八卷別輯婦人小兒痘疹外
科方總皆出入古今八陣以神其用凡四卷共六十四卷名
景岳全書是書也繼往開來功豈小補哉以兵法部署方畧
者古人用藥如用兵也或云公生平善韜鈴不得遂其幼學
壯行之志而寓意于醫以發洩其五花八門之奇余曰此蓋
有天烏特老其才救世而接醫統之精傳造物之意夫豈其
微歟是編成于晚年力不能梓授先君先君復授日蔚余何
人斯而能繼先人之遺志哉是歲庚辰携走粵東告方伯魯
公公曰此濟世慈航也天下之寶當與天下共之捐俸付剞

劂閱數月工竣不肖得藉慰先人以慰先外祖於九原先外
祖可不朽矣外孫林日蔚汝輝敬跋

四庫全書提要曰景岳全書六十四卷明張介賓撰是書首
為傳忠錄三卷統論陰陽六氣及前人得失次脈神草三卷
錄診家要語次為傷寒典雜證謨婦人規小兒則痘疹詮外
科鈴凡四十一卷又本草正二卷採藥味三百種以人參附
子熟地大黃為藥中四維更推人參地黃為良相大黃附子
為良將次新方二卷古方九卷皆分八陣曰補曰和曰寒曰
熱曰固曰因曰攻曰散又別輯婦人小兒痘疹外科方四卷
終為其命名皆沿明未纖佻之習至以傷寒為典雜證為謨

既僭經名且不符字義尤爲乖謬其持論則謂金元以來河間劉守真立諸病皆屬於火之論丹溪朱震亨立陽有餘陰不足及陰虛火動之論後人拘守成方不能審求虛實寒涼攻伐動輒貽害是以救力其偏謂人之生氣以陽爲主難得而易失者惟陽既失而難復者亦惟陽因專以溫補爲宗頗足以糾鹵莽滅裂之弊於醫術不爲無功至於必其說者不察證候之標本不究氣血之盛衰概補概溫謂之王道不知誤施參桂亦足戕人則矯枉過直其失與寒涼攻伐等矣大抵病情萬變不主一途用藥者從病之宜亦難拘一格必欲先立一宗旨以統括諸治未有不至於偏者元許衡魯齋集

有論梁寬甫病證書曰近世諸醫有主易州張氏者有主河間劉氏者張氏用藥依準四時陰陽而增損之正內經四氣調神之義醫而不知此妄行也劉氏用藥務在推陳致新不使少有拂鬱正造化新新不停之義醫而不知此無術也然而主張張氏者或未盡張氏之妙則瞑眩之劑終不敢投至失幾後時而不救者多矣主劉氏者或未悉劉氏之蘊則劫効目前陰損正氣貽禍於後日者多矣能用二家之長而無二家之弊則治庶幾乎其言至爲明切夫扶陽抑陰天之道也然陰之極至於龍戰陽之極至於亢龍使六陰盛於坤而一陽不生於復則造化息矣使六陽盛於乾而一陰不生於姤

則造化亦息矣。素問曰：亢則害，承乃制。聖人立訓，其義至精。知陰陽不可偏重，攻補不可偏廢，庶乎不至除一弊而生一弊也。

劉氏奎景岳全書節文

未見

按右見于劉嗣宗溫疫論類編序

張氏介賓質疑錄

一卷

存

題詞曰：醫道肇于軒岐，而著書立言以發明之者，莫如張劉。

李朱為最，以至陶王陳薛，各有闡述。然亦有不能無弊者，如一言之謬戾，每遺禍于後人，是不得不取而辨論之，以正其失。非敢妄訾乎前賢也，將以為質疑之一助云爾。

程氏崙醫按

五卷

存

自序曰：予先世尚文藝，廣購異書。迨大父光祿公築園求志，益置藏書之所。于時若黃五嶽、沈石田、文衡山、方寒溪及海內諸名士，相率為之題詠，而豐考功、南隅記之從大父方伯。蘿山公留心墳典，其宦遊東浙、西滇、南閩、北伐，所至肆力蒐

索多獲異本。大父或爲中分，或錄其副。度閣中，纍然籤垂幾
埒二百。鄴架無論矣。予生不辰，既不獲侍我大父，又不幸甫
四齡而失我先君。母氏慈愛，不令儕伍羣兒。比就外傳，亦不
令接遇賓客。見人輒面頰口訥，惟誦讀課文是務。長而有知，
稍遍閱諸子史及輿圖。方外諸書，下惟篝燈夜以繼日。即愚
鈍無得而向，廷彌勤弱冠，病失血，然不輟讀也。已而日嘔數
升，甚至口與鼻俱出，體幾殆。於是遵母氏命，釋博士業。已并
一切典籍束高閣，日坐虛室，檢藥裹而已。體遂稍稍復，顧飲
啄之餘，無所事事。間對岐黃養生家言，輒有當於心，復自惟
弱體不任讀父書籍，令腐同草木，生奚貴焉。昔人良相良醫

之言，若將爲予勗者，乃發篋盡得素問難經及越人仲景元
化叔和巢氏滑氏東垣河間丹溪諸名家所論著，暨歷代本
草讀之，悉務究其根宗，會其枝葉，其有不得者，思之至忘寢
食，緣是頗知自衛。居七載而疾有瘳，戶外就醫之屢恒滿。及
母氏歿，始負笈以遊。初三吳既三楚，既梁宋，再後燕趙齊魯。
雲中上谷，樂浪玄菟，足跡半天下。前後幾二十載，而燕爲最
久。所至辱公卿折節，友朋納交，雖固陋之聲稱而刀圭之役，
苟幸免過其間，或擴古人之秘，或剖近代之疑，或集衆思，或
信己意，不必標奇要於對證，不必循軌要於奏功於心得，而
驗者，役不律而歲之篋，苟然倥偬遺忘者，不下十之六七。丁

已冬武選夷庚方君來京携其伯兄天衢君書索予曩所集
傷寒雜證等書付剞劂以廣其傳嗟乎仁人用心固是宜以
汲汲第予井蛙夏蟲不爲蔽拙抑亦以宋人不值周客恐其
什襲燕石以終身乎用是姑出舊所錄藏百有餘條倣昔人
題曰醫按求政大方倘徼靈貺得彈射斧斤之不棄庶幾入
正鵠而就準繩則長公之大造乎哉所集傷寒雜證雖能僅
窺一斑茲當牛馬逐逐未獲完帙請竅異日如謂予不能讀
祖父書而借此薄技以自解免則予愧汗欲死何敢言病又
何敢言醫皆天啓元年春正月

盧氏明銓一萬社草

十二卷

存

堵顏序曰夫醫與政通政除害以致理醫伐邪以葆真其持
危極仆而躋諸生養安全功相埒也歲甲子余拜命來守湖
當妖訐之變群情驚擾而熯滯頻仍苦饑者又苦瘡癘幾不
能保有其生余觸目惻心援竭蹶以荒政屬諸邑長吏百方
調劑復勅建藥局屬盧生明銓金生德生陸生士龍董其事
蓋三生精於醫民可倚以爲命也未幾余亦步禱郊圻病瘧
中州人嬰此一疾遂憊余之從政無乃淪於拙乎然身憊而
民安余固毋之竟藉三生在得無恙因神其術并欲叩其蘊

則盧生以一萬社艸進蓋生與金生陸生輩諸同志相社集
虛懷共質發明醫理以詔後來茲者公餘覽之於治驗示已
試之規於歲在嚴未疾之戒於疑問致辨晰之詳於運氣闡
司天之奧而俚言近而易明食物切而宜慎丹方簡而效捷
究之則守一畢萬其要旨也承學習之衍其傳冠子倚之績
其命功在生人詎曰小補藉令盧生即神聖工功擅絕於時
而不有是草以詔後後何述焉余於是深有當於心也顧尤
有感焉今茲天時歲會各愆其度閭閻空匱豪猾萌生譬人
色澤膚革無異平時而精已消亡倉扁望之投鍼砭是已當
事者審因革酌疾徐補瀉標本稍稍轉呻吟而闔澤易慝惡

而善良若垂絕之夫一旦得醫診視攝理遂使元氣漸復日
履和豫良亦足快而繼此者能常保乎余因民致疾復回疾
念民故於此特惓惓也深願集同志者相與共成治譜偕此
艸並傳而以奏計行矣乃述其意於簡端見醫與政通而上
醫醫國期共勗云

錢氏國賓備急良方

一卷

存

舒氏元貴醫方啓蒙

十五卷

存

孫氏志宏簡明醫說

八卷

存

自序曰蓋聞吾儒民物胞與痾瘵乃身雖醫藝乎依仁者所必游以弘聖賢之德業徹性命之淵微然而醫之人與醫之書鈞重而弗可偏廢世專托命於人不窺其書其失非尠夫古醫精者謂身所暨有盡書所託無窮故各以其所得筆諸書政欲令天下萬世人得而讀焉以偕脫凶疾之極而綏壽康之福豈徒爲業醫者訓乎哉第書緒紛逕猝難領會間

有纂本輒多挂漏或門類未備或真方而不疏病源不析致病異同或未經信驗或方論未盡協古皆於濟世不能無憾先君桂巖翁嘗擬精輯一書行世非徒欲醫者歸博於約兼慮遊宦行商及僻居貧窶倉卒感疾延醫不給顛連罔措者俾得倣書修抹坐收良醫之功厥志慤慤而未竟不佞宏幼業制舉長乃顯醫迄今五十餘載恒以所佩庭訓及所驗心得視人疾慄慄勿敢憑臆勿敢徇俗一摹古人成法遂興念續緒并翦夙願蒐網古今群書反復演互幾換星霜始成斯集卷首先并一十六篇迺修德砥行尊生慎疾之要及醫藥得失嚟緊之綱其次門類臚方必溯致病所由與其同異確

有徵信程古而不私淑博采而不隅執務宣先人救世之懷
衷彌彰于人心目間即諳閱之久而於載籍外別有證悟可
補往哲未發者亦必公諸世毋敢私秘其書備而不冗約而
不漏義類淺顯人人可解若射必有彀故命曰簡明醫鼓云
人人宜手一冊晨夕覽繹以為未然之防偶或違疾有醫則
可據以參同無醫亦可恃以弭患既免受誤於衰見復能默
契於名手捷取守約之益浸為淹博之階可以自利可以利
人寧直天涯遊旅之寶函寔亦家居衛生之靈銓也可謾曰
吾疾自有醫之人在而書可閣弗窺耶則古所稱為人子者
不可不知其謂之何夫開卷有益非醫者尚爾而醫者益可

知矣嗟乎弗自欺乃能孚世惟自慎乃能益人幼誦孔子已
知斯人徒與迨歸竺教逾覺同體親切我人苦樂癢癢胡忍
二親即於此道未敢自謂入微其或不慎以欺世寔未有也
神而明之存乎其人踵事增華俟後之君子崇禎己巳陽生
日武林孫志宏序

鍾祖保序畧曰孫君名志宏字克容台石其別號家世錢塘
人厥考桂巖公以醫術著嘉隆間君仍其業而闡繹之嘗採
藥三山遇異人得龍宮秘訣所至輒活人僑寓我鹽良久鹽
人倚為司命低徊留之不能舍且與吾友松日玄海兩沈君
仲修則梁兩陳君相善予是以識荆云

四庫全書提要曰簡明醫彀八卷明孫志宏撰志宏字台石杭州人是書卷首冠要言一十六則議論亦平正其餘案門列方淺顯易解然未能盡醫道之變化也

陳氏澈雪潭居醫約

八卷

存

王氏象晉簡便驗方

六卷

存

自序曰予性最懶而耽披閱生平素鮮疾病而好蓄藥餌不

諳醫術而喜集成方弱冠以來一切稗官野史斷簡殘編見一方靡弗錄也高賢續論卑夫俚談聞一方靡弗識也間以授人多奇中人有求者輒錄而畀之相知者憐予之僕僕也曰曷梓之乎予謝未博曰舉爾所知爾所不知人其舍諸予豁然有當於心會春曹事簡春日多暇廼畧爲簡汰而付之剞劂隨所採先後第爲甲乙無論次便續增也方多單簡藥多尋常便窮鄉也已嘗驗者人共稱者亟收之否者暫置之便應用也其他傷害物命者雖効弗錄倘此帙行而方因病投病隨方愈共食天和無罹患苦庶幾諸君之意不虛哉若夫分門別類登爲成書此予夙志而今未能也請俟異日

樊氏如栢簡易驗方

十卷

存

自序畧曰易傳言乾以易知坤以簡能易則易知簡則易從至終之曰易簡而天下之理得又曰易以知險簡以知阻其旨互相發云自今觀之天下之理孰有大於醫者乎醫主生人而天地之大德曰生乾坤之易簡是也 驗方合刻竣取此命名翻舊刻之名以易代便與其沾沾爲窮鄉爲應用計也何如令一人見千人亦見一人得千人亦得况究之以驗取効則一也此余稍更其名未更其所載之方雖間參以

已驗者續貂於宗子子之袖珍而轉原本爲新城王康公所輯者殊示正實也無奈其携之東歸已迺更以合刻者何保產保嬰痘疹三要訣一便於產婦一便於嬰兒誠以其方言簡而意盡使人得按如指掌得若神明今而知產爲生育之門痘多天札之患人世之至險至阻者莫此若矣得乾之易以知險坤之簡以知阻詎云要訣而驗方有二乎合之天地大德之生則謂是刻爲生生篇亦可甲戌中秋日寄菴居士樊如栢書

李氏維麟醫宗要略

未見

按右見于蘇州府志

芮氏養仁醫經原始

未見

太平府志曰芮養仁字六吉醫有別解為人恂悞廣聞見士大夫多與之游著醫經原始五方宜範等書十餘卷行於世

五方宜範

未見

劉氏邦永惠濟方

四卷

未見

廣東通志曰劉邦永從化水東人宋翰林權直劉哀然之後生有異質少孤貧樵於山中遇異人呼與俱去授以岐黃之術及上池刀圭之法久之盡其秘歸遂以醫行世一時號稱國手視病多望形察色或以一指按脈即知吉凶可治者輒喜用藥不問資財不治者不與藥泣問之則以指數示曰某日去矣無不如言其用藥不拘古方率以己意變通人多莫測尤精太素脈以斷修短無不中者人皆以為神迎治殆無虛日然為人狂脫恒垢衣敝履笑謔自喜或測并蓬首袒裊捫虱見尊貴人弗恤尤好談仙家上昇事人以為顛廢因自號廢翁卒著藥方甚富人得其方者輒取效今所傳惠濟方

四卷

霍氏應兆 雜證全書

未見

按右見于武進縣志

余氏紹寧 元宗司命

二十卷

未見

新城縣志曰余紹寧字義同祖籍南城移居新城南機坳幼讀書二十學醫術遍訪明師得異授精通唐宋朱劉各家及素問鍼經諸書能預決人死生徃徃奇中其用藥不循舊方

但對證發單邑紳士感服其小心精篤又賦性慈愛尤肯賑恤貧民常制萬病無憂丸施布賴全活者甚眾各上臺嘉其精篤給送官帶巡道莫可期服藥取效亦賜旌表著醫書二十卷名元宗司命其傷寒男婦內外鍼灸及小兒諸方皆精備無遺

岳氏甫嘉 男科全編

未見

家居慎疾良方

未見

旅邸便易良方

未見

讀書辛苦良方

未見

仕宦勤勞良方

未見

行軍濟變良方

未見

急救危疾良方

未見

按右七書見于醫學正印種子編附記

傅氏懋光醫宗正脈

未見

醫學集要經驗良方

八卷

存

吳氏鼎銓醫案

二卷

存

淳安縣志曰吳鼎銓字六長號逸樵雲峰諸生少時慕朱家郭解之為人嗜六韜書籍武備尤善治諸瘍預訂痊可期予

膏劑不爽晷刻却賅謝弗受曰吾以此活人初不圖阿堵物也時稱國手宋中丞又希先生以奇士目之所著醫案二卷今得其方書者猶足以活人

鄧氏景儀 醫經會解

八卷

存

孫氏光裕 血證全集

一卷

存

小引曰夫血證之難言也久矣患此而死者十有六七治此

而生者十無二三豈不誠難矣哉是何以故良繇或冒風寒日濕燥火六象之外感或由喜怒憂思悲恐驚兼之飲食房勞七情之內傷而又每患於讀書攻苦之輩淫慾好色之人何也氣血人身之二儀性命之根蒂形神之依附者也故血隨氣行氣隨血轉晝夜循環生生不息正經所謂一息不運則機絨窮一毫不續則霄壤判矣况此又皆起於火火與元氣不兩立一勝則一負焉請試言夫心君主也百體所聽命者也君主一搖則五志之火觸於怒則爲肝火動於氣則爲肺火耗於思則爲脾火捍於驚則爲膽火過於食則爲胃火竭於精則爲陰火雖有腎水不勝燎原之勢所謂一水不勝

五火者此也。腎天一水也。相火寄於其中。臟府賴以滋養者也。故腎水足則肝得之。有子母相生之益。肺得之無子富母。貧之虞。心得之有水火既濟之功。脾得之有滋榮潤澤之績。水源一虧則腎間惟有一點炎上之火。凌於心則爲吐血。入於肺則爲嗽血。動於肝則爲噴血。出於脾則爲嘔血。若夫咯血唾血欬血皆從腎家來而爲虛損之血。日漸煎熬遷延不起而去生便遠矣。斯時也病者安心靜坐。却慮凝神。藥食調治。醫者究其虛實。辨其血色。臟府用藥溫養。使水足火平。陽生陰長。各歸其位。又何病之不痊。而醫之不効乎。無奈病者在先。不善調理。一遇此證。見其勢之兇湧。遂欲延醫以求。

速止。醫人又依病家之欲急。以能止爲功。以爲捷法。不知此證之發。其來久矣。痰積胸中。必盡得吐出。纔住。雖延三五日。亦復要吐。其逆行之勢。亦不能頓止。不惟不能止。且以寒涼之物塞之。而中其根矣。故必延之歲月。勿妄想勿妄動。勿多言。勿暴怒。勿嗜酒房勞。勿過飽損胃。靜坐養神。緘嘿自持。飲食有節。調理無間。藥餌和平。間心葆攝。則五火平復。而不能爲害。陰血自生。而內火不熾。自得萬全。若欲揚湯止沸。則一杯水難救車薪之火。又何怪乎血證之難爲也。故集失血病機方脈本草一部。雖不能百發百中。亦聊以寓生生之意。以冀萬分中之一得耳。書以求同志者。斧政焉。禹航浮碧主人。

孫光裕書於醉古居。

鮑菴延道人淮南昭陽李氏家藏奇驗秘方

七卷

存

亡名氏醫宗三法

二卷

存

謝氏以聞醫學要義

未見

於潛縣志曰謝以聞字克菴邑庠生安貧篤學守志不阿尤

精於醫崇禎乙亥年八十餘猶手不釋卷所著醫學要義未
行於世

孫氏文胤丹臺玉案

六卷

存

歐氏士海山谷便方

一卷

存

自序曰曩愚行山谷間多病人問何以不治答以市遠無醫
而求藥復不易故束手以待愚心憐之未有以處也會擇術

而居披閱方書見姜蒜葱韭之類先輩每用單行收功而危迫倉卒之際丸散無靈標本易混亦多以單方出奇有捷於影響者由是知尋常菜菓草卉之微皆有補疾病生死之大入特不察耳以此片一熟腸輒不自量選諸經驗良方用物不弘而特有奇効便於山谷者彙成一帙梓之以附舊刻保嬰錄之後名之曰山谷便方成曩志也丹溪曰吾既窮而在下求有可以及人者非醫安務海非敢謂以及人然世或不鄙其易而試之其不至於如烏喙鳩毒之殺人也明矣况其載在簡冊者皆先輩仁心仁聞所隨試輒驗而不可誣者乎人之所病病疾多醫之所病病道少然則此書或亦不可少

之一道也歟嘗崇禎己卯之正人日士海書

施氏沛說療

一卷

存

題詞曰蓋聞醫者意也藥者養也有所資于意不知無意之爲愈也有所待于養不如無待之爲愈也故枚叔曰太子之病可無藥石針刺灸療而已可以要妙道說而去也輯說療十二章

醫醫

一卷

存

題詞曰太史公云人之所病病疾多而醫之所病病道少夫欲奏起疾之功必先明道少之患輯醫醫十章

祖齋

四卷

存

自序曰玄晏先生云仲景廣伊尹湯液用之多驗成聊攝謂自古諸方歷歲浸遠難可考詳惟仲景之書最爲群方之祖要之仲景本伊尹之法伊尹本神農之經軒岐靈素大聖之所作也其於處劑之法則曰君一臣二制之小也君二臣四

制之大也經中如麋啣木澤瀉湯烏側魚散半夏湯雞屎醴等方多不過三四味即後許胤宗亦謂古人用藥簡要精專故仲景之方其藥品甚少後至潔古東垣立方有多至三十餘味者說者謂東垣如韓信將兵多多益善他人効之則未免廣絡原野之譏矣茲所集首冠素靈二方次載伊尹湯液一方以爲宗而後悉以仲景之方爲祖其局方二陳四物四君子等湯以類附焉若東垣之補中益氣丹溪之越鞠等劑誠發前人之所未發雖曰自我作古可也近代醫書如戴元禮之證治要訣薛新甫之明醫雜著方皆簡畧與仲景之意不大紕繆故多採之要之方者倣也醫者意也而上溯軒農

其於方劑之道庶幾焉近之矣崇禎庚辰歲重陽日元元子
施沛題

雲起堂珍籍

一卷

存

朱氏天璧醫準

未見

海寧縣志曰朱天璧字遠菴仁和人明崇禎壬午孝廉也謝
公車貧無舊業以素工青囊術因賣藥海上時兵荒薦瘥璧
行藥濟之全活者萬人不計值人至於今稱之館於烏鵲橋

鄆氏亦長者所著醫準數十卷傳新安程氏吳氏云

蕭氏京軒岐救正論

六卷

存

自序曰夫醫之爲道也總君父師相之權而其學也究天人
性命之微故君子取其精以治身推其餘以濟世斯仁術也
乃後世以方技目之縉紳名士多所弗講司馬公不云乎達
則爲良相不達則爲良醫其可以賤簡爲哉予髫齡弱稟質
鈍志勞窮獵簡編苦心誦著嬰疾夢遺百治莫瘳繼因從宦
游楚慈陽邀學博黃州胡慎菴先生於衙齋治之三月獲痊

先生蓋明醫李瀕湖公甥孫也。因授軒岐秘典，脈旨病機藥性方法，一一精詳。先生又私淑於立齋者也。嗣入蜀，復參印群賢，頗得肯綮。沈酣於斯，二十餘載矣。歸里後，有請診視者，目擊時師治病，昧本從標，枉斃生靈，莫勝悲怛。此無他，蓋以習醫之人，半屬匪人，而所習之法，全非正法。經書不識，旁徑樂趨，於是專傷寒者，忽於雜病；主脾胃者，憚於攻伐；明濕熱者，暗乎溫補；或執成而昧道，靈變或逞臆說而架言出奇，或憑口給而諛詔售奸，罔惜人命，顛倒妄行，不幾為軒岐之亂臣賊子耶？嗟乎！醫病實多，安能先救醫？得醫病愈，而人之病無不愈也。予因是竭一得之愚，悉靈素之蘊，發揮真假脈旨。

闡明藥性宜忌，昭揭病機虛實，朗縣醫病兩鑑，採要五氣歸本，一元數月運腕，始成篇帙。計卷有六，僅字九萬，低徊久之，而猶訝諸法未備也。會二三同志偶見而讀之，曰：得乎一者，可以通乎萬矣。未備云乎？令余亟梓以救世之醫病兩家，復捐貲鳩鈔，將欲以公天下。嘉惠學者而乃不覆孰棄之，予維是書之作也。聞農黃之奧義，抒自苦念，糾時師之謬妄，激自熱腸，萬一寸管招尤，致使正道難明，謗訕日騰，將奈之何？韓退之先生云：其或間居修史，不有人禍，必有天刑。昔越人世稱神醫，不免為同官李醢嫉殺。東垣云：就令著述不已，精力衰耗，書成而死，不愈於無益而生乎？故從古豪傑作用，往往

以身殉道倘斯論可售。惋斯世於壽域而余慙拙無似。何惜一已之知罪乎。後之君子。抑亦諒余之所以為救為正也歟。崇禎甲申春二月上浣之吉。閩中通隱子蕭京萬與甫撰。

莊氏應憲 醫案

二卷

存

按右附刻于軒岐救正論後。莊應憲字汝元。溫陵同人也。林應楷有莊隱几先生傳。又附其末。

王氏元標 醫藥正言

未見

按右見于江寧府志。

王氏辰 醫學狐解

六卷

未見

虞氏洪春 醫學須知

未見

何氏繼高 軒岐新意

一卷

未見

按右三書見于浙江通志。

盧氏之順 痰癘論疏

一卷

存

自引曰痰癘因證素問癘論及刺癘法最詳而悉後世守其偏承致經義蒙晦訛謬良多審因者畧證局證者昧因知常而不及變循變而反舍常殊不知有是因方有是證因證既顯常法已具而始可與達變矣乃或常法既迷因證靡辨以寒爲熱熱爲寒虛作實實作虛致微者劇劇者危展轉變承連年月不已其死生存亡莫之能測也偶方孺先生舉問及此聊紀數語以就正

方孺先生姓潘名鏗嘉定人

王琦跋曰傷寒之疾本于風寒而痰癘本于風暑寒暑相反若風馬牛不相及也今之醫者有傷寒轉癘疾癘疾轉傷寒之說未詳本自何書而千口雷同習焉不察讀晉公痰癘論疏其論風氣獨盛絕無暑象一則深闢世人謂傷寒轉而成癘之謬深切顯明真足以醒群蒙之聾聵者矣友人婁荆川深契是書之奧有久癘未愈者按其六經藏府所屬而治之應手取效蓋信此書足珍也或者訾其抄撮靈素陳言金匱舊方無一新竒竊獲之快論妙劑者此直睡人吟嚙語耳烏足與之深論耶乾隆甲申七月辛亥朔錢江王琦書

四庫全書提要曰痰癘論疏一卷明盧之順撰之順字子繇

錢塘人是書論痰瘧證治於虛實寒熱四者最為詳盡足以發明素問瘧論刺瘧論諸篇微意大旨謂瘧屬陽痰屬陰日作者屬陽間數日作者屬陰而曰溫曰寒曰痺曰牝皆可以痰瘧該之其立方多取王肯堂證治準繩其餘所列諸方亦多簡當雖書不過一卷然治瘧之法約畧盡乎是矣杭世駿道古堂集有之願小傳稱所著初有金匱要畧摸象為其父所焚續著有本草乘偈今行於世後著有摩索金匱九卷又有傷寒金銀鈔醫難折疑二書今未見傳本獨無此書之名或世駿作傳之時未見其本故亦疏漏歟

醫難折疑

未見

李氏德孝 醫學正蒙

未見

浙江通志曰李德孝字時慕

陳氏樵 群書纂集

未見

浙江通志曰陳樵字時彩

董氏一麟 醫學問世編

未見

浙江通志曰董一麟字時野

金氏忠 廣忠集方

一卷

未見

浙江通志曰金忠字尚義麗水人

張氏琳 醫說妙方

十卷

未見

浙江通志曰明巡撫保定副都御史勾餘張琳刪定

伍氏翁 醫書會要

未見

沈氏宏 醫筌

未見

陸氏長庚 體仁彙編

未見

吳氏延齡 醫學質疑

未見

金氏孔賢 丹山心術

未見

趙氏金 醫學經畧

未見

邵氏繼稷 經驗良方

未見

按右七書見于浙江通志

陳氏時榮 三難一覽

未見

病機提要

未見

按二書見于松江府志

錢氏寶 醫案

未見

鎮江府志曰錢寶字文善原濬曾孫號復齋詩多藻思工小楷行書精于醫極危濟困恒孜孜焉所著有醫案運氣說

王氏章祖 橘井元珠

未見

蘭谿縣志曰王子英孫章祖字叔貞纂有橘井元珠

釋氏住想 慎柔五書

五卷

存

石震小傳曰師毘陵人胡姓本儒家子生而敏慧稚年寄育僧舍長尋薙髮法名住想字慎柔性喜讀書凡一切宗乘以

及儒書經史子諸編無不究覽心血耗疲得瘵疾幾不起時
查了吾先生寓醫荆溪師往求治歲餘獲痊了吾先生涇縣
人爲太平周慎齋先生高座師穎悟沉静了吾先生深器之
欲授以已學師繇是執贄事先生十餘年先生懼其學識過
已迺令往從慎齋先生與薛理還偕行理還亦毘陵人予于
已卯春曾識荆于嘉水時年已逾七十因出了吾生平所驗
案及禁方贈予予自此益盡窺了吾之學慎齋先生名滿海
內從游弟子日衆師隨侍每得其口授語輒筆之先生初無
著述今有語錄數種行世多師所詮次也師自是歸里治病
輒應履日盈戶外然性好施雖日入不下數金而貧如昔歲

庚午吳江宰熊魚山先生夫人抱奇恙六七年矣延師至以
六劑奏效一時薦紳士大夫咸服其神明因往來吳會間里
居之日少歲壬申予時習岐黃家十餘年雅慕師每相過從
談論輒達曙忘倦師每憶生平所學嗣者寥寥言之惋然然
竊謂師貌古神閑當得永年亡何丙子仲夏忽示疾以手札
招予授生平所著書凡虛損一癆瘵一所劄記師訓一治病
歷例一醫案一又數日竟脫然去年六十五距今又十年矣
予將以其書壽之于梓因爲之傳

張氏延登懸袖便方

四卷

存

徐氏韞奇醫略

未見

按右見于蘭臺軌範附洄溪府君自序

醫籍考卷六十二

矢鳴玄碩寫

